

Хөөнә тӧл авлгънд оньган ӧгхмн

Хӧ ӧсглгънә кӧдлмшт—хӧөнә тӧл авлгънас ах чинртә тӧр уга биший. Хӧөнә тӧл авлгънд белдлгън—зуг хӧӧдәс гарсн хургъд тоолдж авлгън иш. Иигдж медхлә, эндӱ болх билә. Эн, хӧ ӧсглгънә тӧрт хагългч эркн чинртә, хӧөнә тӧл авлгънд белдлгън, утхлад келхлә, хӧөнә кӧг тәвлгънәс авн экләд, ӱвлин утуршарт хӧд хургълтл кегдх зӧвтә. Экнъ таргън-цатхлнъ болхла, хургъднъ чанъгъ-чиирг, бооджнъгъу болдмн. Тер цугтад медгднә.

Тегәд чигн танъгъчин совхозмудин, МТС-н болн колхозмудин сән гардачнр, нертә хӧӧчнр, дадмг малчнр ик эртәс авн малин хотан белддж, кошаран болн әльк-нег зерзевән ясдж, хӧөнә хургъллгънд белдихәнә. Белдлгънә кӧдлмш сәәнәр кегдсн совхозмудар болн колхозмудар хӧӧдин хургъллгън йилгъән ӱзмджтәгъәр кегддж йовна. Нилх хургъдин цогцин ӧслтд кергтә церд, ясна гуыр кӱртлнъ эртәс белдцхәнә,

Целинн района „Степной“—

совхозин ах хӧӧч Е. М. Чавычаловин отарт 100 хӧӧнәс 135 хургъд ода деерән авгдджана. Бас тер района „Балковск“—совхозин ах хӧӧч В. М. Маяцкий 100 хӧӧнәс 125 хургъ авчана. „Родина“—колхозин ах хӧӧч Г. А. Скалкин болхла, 100 хӧӧнәс 133 хургъ авчана.

Эн хӧӧчнр, хургълсн хӧӧдиг нилх хургътагъинъ салу туслнъ хашад орулад, экинъ хотар гӧрләд, хургъинъ кӧкӱләд, кергтә болхла увджд, кӧлд орулдж бооджулна. Эдниг тегәд экинъ дахулдж хәрӱлдж харна, эн—хургъдиг хаша-бәәрнднъ бәрдж бооджулгън гидгнъ эн болджана.

Зәрм совхозмудин болн колхозмудин партийн эклцин организац сулар гардвр кеджәхин ашд, танъгъчин зәрм эдлахусар хӧөнә тӧл авлгън ик сән йовхш. Одахн КПСС-н танъгъчин комитет, „Прудовый“, „Западный“ болн нанъ чигн совхозмудт хӧөнә тӧл авлгъна кӧдлмш ягъдж кегддж йовхиг хәләв. Эн совхозмудт кошармуд цагтан ясгддж цеврлгдсн

уга бәәдж, хургъд хәләх улснъ чигн тату бәәдж. „Родина“—колхозин дӧрвн отармудар церд, давсн чигн уга бәәдж. Хургълсн хӧӧдт ӧгх концентрат бас уга бәәдж.

Эн учрар хургъд зуурм гарлгъна, ӱклгънә болн талдан чигн му йовдлс болсн бәәнә. Иим учрин ашд зун хӧӧнәс хургъд авлгън района эдл-ахусар багърна. ӱлгӱрнъ, зун хӧӧнәс хургъд авлгънд „Ленинск“—совхозд 113 процент, „Родина“—колхозд болхла 114 процент болв.

Советск орн-нутгин цуг олнкелн улс агъу ик политическ болн эдл-ахун ӧргмджтәгъяр Алдр Октябрин 40 джилин ӧӧнд белдвр кеджәнә. Кӱч-кӧлсч олиг, ода делгрдж йовх кӧдлмшин дуту-дундс ахр цагт уга келгънд агслгън—тер ӧӧниг угтгч дӧрлдәнә нег эркн чинртә тӧрнъ.

БОЛДЫРЕВ.

КПСС-н танъгъчин комитетин селәнә эдл-ахун отделин инструктор.